



**Umiarsuarmik ilaasartaammik sinersortaammik Nanortalimmiit Upernavimmut angalasoqarsinnaasun-
ngorlugu 2020-miit ataatsimik umiarsualiisoqaqqinnissaanik sulissuteqaqqullugit Naalakkersuisut peq-
qunneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Aqqalu C. Jerimiassen, Atassut)

(Siullermeerneqarnera)

Demokraatini isumaqatigaarput nunatsinni angallaneq akikinnerusariaqartoq. Taamaattumik aallaqqaataaniilli ersarissumik nipeqarluta mittarfiliortiternissat isumaqatigisimavagut tamatumap attaveqaqatigiinneq ataatsimut isigalugu akikinnerulersittussaammagu neriuppugullu tamanna aamma bilittit akikinnerulernissaannut sunniuteqarniartussaavoq. Taamaasilluni mittarfiliortiterneq nunatsinnut tamarmut iluaqusiisaaq.

Manna siunnersuut aqputigalugu Atassutip kissaatigaa ataatsimik ilaasartaammik umiarsualiisoqaqqissasoq. Partiilli tunngavilersuutai naapertorlugit nalilersoruminaappoq tamanna pisariaqarnerasoq aamma taamatut nalilersoruminaappoq aningaasatigut qanoq kinguneqassanersoq. Atassutilli nammineerluni oqaatigaa Angallaneq pillugu Siunnersuisoqatigiit nalilernikuugaat 250 mio. koruunit missaannik akeqarumaartoq. Tamatuma kingorna ukiut tamaasa ingerlatsinermut aningaasartuutitigineqartassapput 60 millioner koruunit inulaarlugit. Tassunga atatillugu Demokraatini tikkuarusupparput 2010-miit ullumimut akit qaffanngitsoorsimanaviangitsut, Angallannermi pillugu Siunnersuisoqatigiit naatsorsuutaat 2010-minngaanneerput.

Qanorluunniit oqalukkaluarutta aningaasarpasuit eqqartorpagut taamaakkaluartorli aningaasalersuinissamu Atassut siunnersuuteqaqqanngilaq. Siunnersuuteqaqqanngilluinnarpoq.

Tamanna Demokraatini isigaarput piviusorsiorpallaannginnertut. Iluaqutaanngilaq siunnersuuteqaqqasagaanni ima akisutigisumik allaat nalullugu qanoq aningaasalersorneqassanersoq. Tamatuma saniatigut malugisariaqarpoq Angallaneq pillugu Siunnersuisoqatigiit nalilernikummassuk, ingerlatsinermut aningaasartuutit eqqarsaatigalugit imminut akilernerpaasinnaagaluartoq ilaasunik angallassisarneq unitsilluinnartuugaanni. Taamaattumik isumaqaaqajaanarpoq sinersortaammik immikkut umiarsualiinissaq niunerlunnerungaatsiartussaassasoq.

Siunnersuutip itigartinneqarnissaa tamanna tunngavigalugu inassutigaarput.